

四庫全書

史部

欽定四庫全書

殿閣詞林記卷七

明 廖道南 撰

宮詹等附

掌詹事府事韓國公李善長

李善長鳳陽定遠人素負大志至正辛卯盜起汝潁壬辰江淮大亂我高皇帝自濠如定遠善長遇焉相得甚懽俾掌書記參謀軍事甲午克滁州時滁陽王郭子興

自泗還欲留善長善長不從乙未正月取和陽上出擊
鷄籠山寨值有兵寇和陽善長擊走之既而上渡江俞
通海以舟師來歸上喜謂善長曰吾事濟矣遂以六月
朔渡江次牛渚拔采石克太平善長預書禁約榜文凡
遇入城懸之以故軍士秋毫無犯初置太平興國翼元
帥府以善長為都士丙申三月克建康籍軍民凡五十
萬上欲發兵取鎮江恐諸將弗戢悉數其過欲置之法
善長懇救獲免七月善長率羣臣奉上為吳國公置江

南行中書省以善長為參議丁酉取毘陵寧國皆克之
戊戌上親征婺州善長留守建康招降陳氏守將丙午
四月上往濠梁八月遣兵討張士誠善長悉為經畫吳
元年六月善長率羣臣勸上即帝位畧曰殿下起濠梁
不階尺土遂成大業剗削羣雄遠近歸心宜早正位號
以順天命上辭至再九月俘張士誠上御戟門論平吳
功封善長為宣國公左相國是月遣將取中原及福建
廣西諸路十二月甲辰善長總裁律令書成賜賚有差

癸丑復率羣臣勸進畧曰開基創業既宏盛世之興圖
應天順人宜正大君之寶位蓋以道化民者皇以德教
民者帝惟首出乎庶物用光建于鴻名繼百王而立國
家定四海而總綱紀事聞在昔運際當今殿下勇智自
天聰明冠世掃除六合之風塵拯救兆民于水火擁樓
船以西上孺子秉璽而出迎命將帥以東征僞主束身
而就縛天下歸服若江漢之朝宗邦域肇隆有金湯之
鞏固既膺在躬之厯數必當表正于宸居上復辭之乃

以甲子告于昊天皇祇以明年戊申正月四日乙亥
即位國號大明改元洪武時御史中丞劉基學士陶
安上言中書省及都督府倣元舊制設中書令議太
子為之上曰取法於古必擇其善者從之苟不善是
從而欲望治猶登高岡而却步渡長江而迴楫豈能
達哉元人事不師古設官不以任賢惟其類是與名
不足以副實行不足以服衆豈可取法且吾子年未
長學未充更事未多所宜尊禮師傅講習經傳博通

古今識達機宜他日軍國重務皆令啓之何必倣彼
作中書令乎乃命詹同取東宮官制觀之謂同等曰
朕今立東宮官取廷臣勲德老成者兼其職老成舊
人動有典則若新進之賢亦選參用夫舉賢任才立
國之本崇德上齒尊賢之道輔導得賢人各盡職
故連抱之木必以授大匠萬金之璧不以付拙工至
是以李善長為太子少師兼詹事馮宗翼兼副詹
事胡廷瑞廖永忠李伯昇同知詹事趙榮王溥同知

副詹事楊憲傳璵兼攝府丞康茂才兼左率府張興祖
兼右率府顧時同知左率府孫興祖同知右率府吳禎
兼左率府副使耿炳文兼右率府副使鄧愈湯和兼諭
德劉基章溢兼贊善大夫文原吉范顯祖兼太子賓客
上諭善長等曰朕今于東宮官屬不別設府寮而以卿
等兼之者蓋軍旅未息朕若有事于外必留太子監國
若設府僚卿等在內事當啓聞或有聽斷不明而與卿
等意見不合卿等必謂府寮導之嫌隙由是而生朕所

以特置賓客等官以輔成太子之德惟選名儒為賓友
昔周公教成王告以克詰戎兵召公教康王告以張王
六師此居安慮危不忘武備蓋繼世之君生長富貴泥
于安逸軍旅多忽而不講一有緩急罔知攸措二公所
言不可忘也二月善長率羣臣上郊社宗廟議三月取
汴梁四月取河南府五月上幸汴梁善長留守京師軍
國重事啓聞皇太子八月車駕還善長奏定吏戶禮兵
刑工六部官制設尚書侍郎郎中貲外郎主事各有定

品十二月定官民喪服之制及三師朝東宮儀二年正月定太歲風雲雷雨嶽瀆諸神祭禮及翰林官制二月丙寅修元史命善長為監修乙亥奉詔立皇陵碑四月編祖訓錄定封建諸王國邑及官屬八月定大祀受誓戒十二月議賞平中原及守禦諸將功次三年正月議出師征沙漠三月議定朝臣服色悉准散官四月定官民書札式五月承制存恤陣亡子孫六月奏禁淫祀及左道惑民者定文官朝服之制十二月壬辰大將徐達

等平沙漠師還善長率羣臣上表賀丙申大封功臣上諭諸將曰朕自起兵以來爾等披堅執銳戰勝攻取功曷可忘今天下既定報以爵賞皆朕所自定至公無私如李善長雖無汗馬之勞然事朕年久給足軍食其功甚大已列公爵今進封大國以示褒嘉乃授開國輔運推誠守正文臣特進光祿大夫左柱國太師中書左丞相韓國公叅軍國重事仍賜誥命鐵券是冬禮部尚書陶凱請專選東宮官罷善長等兼職庶於輔導有所責

成上曰古者官不必備惟其賢朕以廷臣有才望勲德者兼東宮官非無謂也嘗慮廷臣與宮寮有不相能遂成嫌隙或生奸謀離間骨肉其禍非小若江充之事可為明鑑朕今立此兼職庶父子一體君臣一心允無相構之患也一日上因齋戒語善長曰人之一心極難點檢心為身之主若一事不合理則百事皆廢所以常自檢心凡事必求至當善長頓首曰陛下此言乃聖賢治心之道心既治天下無難治矣四年正月乞致仕許之

十三年正月胡惟庸伏誅辭連善長上曰朕初起兵善長即謁軍門曰有天有日矣是時朕年二十七善長年四十一所言多合朕意遂命掌簿書贊計畫爵以上公子尚公主此吾股肱心腹不忍罪也五月復以善長代安然理御史臺事十六年雲南平善長上表賀二十三年榜列逆黨勲臣凡五十七人會星變有以善長為黨者上疑之五月乙卯善長卒廖道南曰太子天下本也古之教太子者有師以道之教訓有傳以傳之德義有

保以保其身體是故三公三少明孝仁禮義以導習之
於是選天下之端士孝悌博聞有道術者以衛翼之是
故太子生而見正事聞正言行正道左右前後皆正人
也故曰一正君而國定矣我聖祖神謨睿見高出千古
開國之初即以李善長等兼其官以劉基宋濂等司其
教而又申之以聖訓是故三代之遺法猶存也錄善長
者昭元功也原東宮輔導之始也略諸臣而不錄者非
專官也贊曰於皇國本宗社之紀必善其終必正其治

我聞三代文王世子居處有箴萬事就理聖謨弘遠元
臣是委嘉言孔章淵哉厥旨

詹事兼兵部尚書唐鐸

唐鐸鳳陽人初守濠州庚子從上討江州授西安縣丞
召還除中書管勾出知延平府洪武三年召為殿中侍
御史四年正月己亥御史臺進憲綱四十條上覽之謂
鐸等曰元時任官但貴本族輕中國之士南人至不得
入風憲豈皆公道朕之用人惟才是使無問南北風憲

作朕耳目任用得其人自無壅蔽之患鐸對曰臣聞元
朝遣使宣撫初出之時四方驚動及其至也略無能為
民為之語曰遣使宣撫問民疾苦來若迅雷去若敗鼓
至今羞之陛下一視同仁任官惟賢尤重風憲明立法
度所以安百姓興太平也未幾復出知紹興府陟刑部
尚書改太常卿守制家居賜食半俸服闋轉兵部尚書
遷諫議大夫十七年四月己丑上謂鐸曰人有公私好
惡不同故其言有邪有正正言務規諫邪言務阿諂謗

言近于忠諛言近于愛惟不惑于謗言則聽日聰而讒人自去不眩于諛言則智益明而佞自絕矣鐸對曰聽言之難自古為然惟不為所眩惑則讒佞自遠上曰朕日總萬幾所行有得失非資人言何由以知故廣開言路以來衆言言有善者則獎而行之言之非實亦不之罪惟讒諂面諛者決不可容也尋以事左遷監察御史陟右副都御史復為兵部尚書致仕二十二年四月丙寅置詹事院秩正三品上謂吏部侍郎侯庸曰朕觀歷

代賢明之君子輔導太子必擇忠正賢良之士三代保
傳禮甚尊嚴後世若唐太宗為子擇師傳而李綱之徒
直言正議頗有裨益今東宮官屬詹事未設衆務無所
統領兵部尚書唐鐸為人謹厚有德量亦當是任其以
鐸為詹事仍兼尚書之祿逾年加少保二十七年四月
癸未上謂鐸曰帝王之於天下體天道順人心以為治
則國家基業自然久安朕思前代亂亡之故未有不由
於違天道逆人心所致也天之愛民故立之君以治之

君能又安生民則可以保天眷卿與共事者久夙夜左右資弼良多凡朕之事天子民有弗至者卿即以為言使知所警毋謂已安不以為意治亂繫焉鐸頓首曰陛下敬天恤民之心惓惓如此臣雖老悖敢不奉命鐸為人厚重慎密上每以故舊遇之嘗稱之曰鐸自昔至今其與人交不知變色交絕不出惡聲其見恩遇如此卒年六十九廖道南曰我聖祖開國之初雖以李善長等兼東宮輔導然而未設專官也至是唐鐸為詹事且稱

其謹厚有德量嗚呼有德足以受天下之善有量足以容天下之才受天下之善而天下之善歸焉容天下之才而天下之才趨焉嗚呼休哉聖謨亦弘遠矣贊曰少海波澄前星光燭惟彼重離國本所屬守曰監國出曰撫軍惟蚤諭教克長克君彼鐸老成天壽平格苟非其人其胡能國

御史中丞兼太子賓客章溢

章溢字三益浙江龍泉人幼從鄉先生王叔剛游留心

正學元憲使圖卜沁布哈與語大悅之要與俱之奉溢至
虎林心動辭歸而父病已革人以為孝感至正壬辰寇
犯龍泉溢從子存仁為寇所獲溢以身代克石扶宜孫
平慶元及松溪溢有力焉乃奏上其功授龍泉簿溢辭
不受海寇起黃岩攻台城他寇攻龍泉溢計平之值龍
田歲歉乃以私田易粟里人多蒙其濟處州七邑盜起
溢檄千戶曹勝安督兵授以方略一戰而降改授松陽
縣尹又辭不受既而平鄭寇于麗水退長鎗軍於婺州

授奉訓大夫僉帥府事又辭不受乃結廬匡山避地之
閩中歲庚子高皇帝遣使徵之溢與劉基葉琛宋濂偕
至建業上勞之曰吾為天下屈四先生爾然四海紛紛
何時定乎溢對曰天道無常惟德是輔惟不嗜殺人者
能一之上曰卿等其留輔子亡何擢僉營田司事巡視
江南及兩淮多所匡治上一日問溢安否都事張來碩
曰溢夙夜在公勤勞憂鬱成疾遂命溢歸省留其子存
厚于京師乃遷溢浙東僉事王師平楚乃又遷溢湖廣

僉事溢至覩荆襄多曠地建議分兵屯田且以控制北方為便行省鎮撫回回怙惡溢以法罪之時河內按察使宋思顏浙東按察使孔克仁僉事王疇俱彼運繫上命溢為浙江副使溢辭曰臣同列獲罪而獨蒙寬宥若加之擢過亦大矣乃仍僉浙東事值山寨多叛開越寇合攻慶元溢召兵設策恃以無恐浙西諸郡悉平上加獎甚至曰章溢雖儒臣父子宣力一方其功不在諸將下洪武元年正月拜御史中丞尋兼太子贊善大夫溢

務存大體不屑屑於細故或以為言溢曰憲臣百司之
儀表居其職者當先養人以廉耻使人避而難犯豈直
恃搏擊為能哉上親祀社稷會大風雨還坐外朝欲斬
諸儒議禮不合者溢曰陛下誠心自足以通感神明
若以風雨罪之人其謂何溢後以母憂辭歸負土成墳
二年卒年五十六廖道南曰贊善大夫之職兼之者始
劉伯溫既則章三益唐鐸也特著三人者彰名臣也溢
之經濟贊亮載在名臣錄及功臣錄者不為少矣畧之

者存其槩也贊曰元氏國頽民率為厲出而濟時去以
全義結廬匡山以待聖世營田觀風莫辭勞勩提兵于
南邦人攸暨臺端諤諤金汝作礪忠孝全歸心無所滯

殿閣詞林記卷七

欽定四庫全書

殿閣詞林記卷八

明 廖道南 撰

史館附

修撰陟禮部尚書朱夢炎

朱夢炎字仲雅江西進賢人元進士金谿縣丞歲丙午
以故官入朝授國子博士吳元年遷修撰夢炎博學能
文凡稽古禮文志多預議未幾補浙江按察司經歷洪

卷八
武二年轉山西行省員外郎召入為禮部員外郎尋陟
侍郎本部尚書

修撰兼大本堂待制王僕

王僕字

原闕

河南祥符人元末為國子助教洪武初徵

為修撰四年開科取士僕與典試又命于大本堂授吳
王經遷待制後以子弘為龍江遞運官忤丞相胡惟庸
寘之于理惟庸敗僕來京授徒上忽問僕安在左右告
以其故召見慰勞甚至賜以綺帛仍給舟還于家

修撰孔克表

孔克表字正夫浙江平陽人孔子五十五代孫也至正戊子進士洪武六年正月徵為修撰克表長身美髯學篤而不窳尤精於諸史所著有通鑑綱目附釋宋濂稱其書世不可無視穿鑿性命簸弄詞章者不侔故一時士林稱為巨擘云

修撰劉泰

劉泰字

原闕

山東淄川人洪武間為修撰上親勅曰朕

聞孔子之諭孝也遊必有方斯可為孝矣朕昨與卿遊
東苑詢及卿家事卿對以宗族甚蕃遭兵漸減獨老母
在別無侍養卿云至此朕心惕然吁哀哀父母生我劬
勞今朕雖君天下育萬民二親已逝恨不生今於朕有
戚戚焉若欲迎親就養或棄職往侍朕勿拘焉

修撰趙新

趙新字彥銘浙江樂清人洪武初任本庠訓導出知開
封府入為國子助教陟山西右布政使復改修撰上賜

勅曰士之所以能立以保其終者有三品焉上才之士
志高量大其所為無所不可中才之士謹守成法不失
其忠然不至于為惡此皆足以保其身者也惟卿質真
無偽涉獵書史始為國子助教能舉其職及遷山西布
政使雖無所設施而持身廉潔朕以卿本儒者而才不
及中人不宜任以政務授翰林院修撰既而見卿年老
多疾特令致仕卿其保厥終始以副朕懷所著有四書
說約行素稿

修撰李叔允

李叔允字

原闕

河南鈞州人洪武三年任國子博士洪

武六年纂修昭鑑錄同事者則秦王傳文原吉助教朱復錄事蔣子杰呂宗盛杜環張雲翀吳從善王鏞宋善也書成叔允擢修撰及修洪武正韻亦與有力焉廖道南曰國初設國史修撰諸職蓋以擬宋制云而朱善為大學士朱夢炎為大宗伯此其最顯者也觀孔克表所著潞州學記所養正矣而王僕之直劉泰之孝趙新李

叔允之博雅皆有可取焉又有迕原霖者未知其為迕
雨否也吾於弔唐肅文見之矣贊曰仲雅不羣博而能
精王僕克直而忱而恂克表聖裔存性之貞劉泰孝養
情感丹宸彥銘叔允華國之文懋績編摩不貳其心

修撰達魯與權

達魯與權其先朔人後居河南永寧仕元為河南北道僉事
以故官入朝洪武六年為秦府紀善改監察御史上疏言堯
舜禹湯文武相承為道統孔子顏曾思孟相傳為道學宜崇

祀典七年八月復上疏言王者立始祖之廟又推始祖所自出之帝祀之於廟故曰禘祭今受命已七年矣而禘祭未舉甚為匪彛也上皆納之先是出為廣西僉事未之任復召回至八年三月擢為修撰降典籍轉應奉致仕自稱洛上翁上親為說辨之文多不載又有莽蘇爾伊克瑪哈穆特西域人也能通華夷譯語善測天文上命為編修特勅勞之廖道南曰天地無棄物王者重絕人信斯語也古之則者守門瞽者司樂宮者守宮各全其生也而寄象覲譯無弗設焉與

權達魯不猶是乎特著莽蘇于編修者附莽蘇也外之
也贊曰聖人用人造化成物小大各脩罔不充足元之
孽臣號曰達魯亦有莽蘇為我供役秉政中華日際月
域他山之石可以攻玉

起居注熊鼎

熊鼎字伯穎江西臨川人元至正七年鄉舉為龍溪書
院山長遇兵亂陳友諒屢強之仕不就王師駐鄱陽大
將軍鄧愈聞其名請與相見鼎母黎氏乃言曰聞江表

有真主兒可速往矣上至南康召至軍門與語大悅欲授以事鼎以母老辭乃留置幕府叅贊軍事丙午徵至京師授德清縣丞吳元年為中書博士改太常博士編集經史事類成遷起居注七月乙亥上御戟門命選樂舞生召學士朱升范常閱試上親擊石磬學士不能辨以宮為徵上詰之鼎曰八音之中石最難和故書曰於予擊石拊石百獸率舞上曰石音固難和然必以人聲為主入聲既和即八音和矣因命樂舞生舞歌一曲上曰古者作

樂以和民聲格神人而與天地同其和近世儒者鮮知音律之學欲樂和顧不難哉鼎曰樂音不在外求實在人君一心君心和則天地之氣亦和天地之氣和則樂無不和矣時耿忠奏廣信郡縣茶稅不實上命御史往廉其事鼎諫曰朝廷新布大信于四方柰何肆赦之後復徵細務是褻國威也又欲徵浙西糧輸京師鼎復曰國家都金陵以浙西為根本農作方興而據困之民害深矣上雅重其言凡創制更革之典鼎預聞洪武元年

六月以鼎為浙江僉事尋調山東陟副使三年封建諸王以鼎為晉王傅會有事方丘鼎當導駕既齋宿習射苑中上命近臣俱射鼎一發中鵠上喜酌湊飲以賜四年故元四大王出沒為寇居民震恐上以鼎不能弭寇左遷大同知事五年復授晉府叅軍七月召為刑部主事八年西戎多爾濟巴勒率部落內附上以鼎老成歷事岐寧衛經歷賜金帛以行鼎密䟽論之上遣使慰勞賜以裘帽已而遣中使趙成召之還行次西涼打班驛巴

勒叛酋約噶擁鼎還鼎切責以大義遂及趙成與知事杜實俱被害鼎時年五十五上聞悼惜遣使葬之黃羊川仍以祿給其家廖道南曰予讀宋學士撰鼎父萬初及其母黎氏銘心竊賢之及觀國史述鼎死難悽惻牢落又不知涕之無從也然而論樂之和本于君心嗚呼鼎之學亦正矣宋濂銘畧曰啓國之初俊才如雲其心之真允惟熊君帝謂相臣鼎也可恃不負吾民寧負吾子既入授經復出治戎狐裘毳衣惟帝念功封論邊事

其策甚偉欲召用君君則道死

編修蘇伯衡

蘇伯衡字平仲其先蜀人文定公裔子遲守婺遂居金華伯衡幼警敏絕倫肆力古人洪武初徵為國子學錄擢編修與劉基宋濂魏觀胡翰相友善基曰平仲著作語粹而氣達不凡而意不詭蓋其明于理而昌于氣也濂曰平仲辭精博而不麓澀敷腴而不以綺縟其視魯弓郤鼎均也翰曰平仲托物以造端比事以寓意緣情

以見義明於國家之體達于人情之變其出蓋無窮也
伯衡在史館多所著述及纂修元史成宋濂舉以自代
伯衡以曠辭歸上賜之綺帛給道里費周之復起為處
州府學教授遂居平陽有文集十五卷

編修王廉

王廉字熙陽浙江青田人洪武初為編修二年正月安
南國王陳日烜令陪臣同時敏上表稱臣上嘉其意遣
侍講學士張以寧典簿牛諒往諭仍錫以璽書金印未

及境而日燿卒以寧乃留詔即次于洱江先遣牛諒之
其國嗣君曰日爨復令陪臣杜舜卿來告哀上素服御
西苑之幄殿親製奠章命廉充祭弔使同考功主事林
唐臣往既至其境日爨出迎于郊議授受禮往返數四
不能決廉厲聲訶之乃奉御製于綵輿迎入壽光殿別
設日燿靈位于殿前使者南向宣之日爨率羣臣再拜
俛伏以聽成禮而還既歸述所撰歌詩曰南征錄宋濂
序之稱其措辭和而不流激而弗怒雅而不凡可謂能

專對者矣使旋擢工部員外郎不拜改澠池丞所著有迂論數十冊

編修張美和

張美和名九韶以字行江西臨江人十三能詩詞元至正間隱居教授洪武初辟為清江教諭轉國子助教擢編修美和善著書奏對稱旨後以疾致仕上親賜勅曰古之至賢之士修己行仁以為時君之用否則獨善其身以終天年或著書立言傳之永久雖不顯于當時而

光于後世爾美和篤信至善不易其守侍朕左右日與
同遊詢問典禮以沃朕心柰何年高不能自強不忍任
以周旋從卿歸老於戲千載一遇古今通言卿善始終
不亦美乎廖道南曰予觀南征錄慨然興嘆嘉熙陽之不
辱也及讀理學類編乃見其義精而語確美和所得者
深矣贊曰炎荒絲邈桂海梧山厥土霍瘴厥途間關允
矣熙陽事不避難大江渺茫匡廬彭蠡其道云遠其室
伊邇誠哉美和著書達理

編修高啓

高啓字季迪蘓州長洲人少孤力學工於詩詞時張士誠據蘓有叅政饒介者喜延士啓方弱冠介見大奇之待以上賓啓不之荅乃隱于松江之青丘洪武三年初修元史徵啓與儒士汪克寬胡翰宋喜陶凱陳基曾魯顏增趙汭張文海徐尊生黃憲傳恕王錡傳著謝徽克纂修之任書成擢啓編修命教勲臣子弟徽字玄懿與啓同鄉啓嘗夢與徽承召問予告身後上御闕樓召啓

與徽敷對詳明雅稱簡注命啟為戶部侍郎徽為吏部
郎中果如夢所感啟辭以少未更事遂與徽俱歸賜金
帛有差啟復居青丘先是蒲圻魏觀署史局啟與交悵
及觀守蘓聘啟至學宮延訪郡中利病多所裨益觀懼
于禍遂連生啟君子悼之啟身長八尺有文武才博羣
典為文汪洋浩瀚神噓鬼吸靡有痕跡其為詩也波起
雲湧颭號電掣直超脫元宋而上宗盛唐近代詩人未
之能及惜其傳之不多爾所傳有鳧藻全鳴二集廖道

南曰予觀蘇平仲集善叙事理鬱而文質而不俚覈而不
夸及觀高季迪集天趣飄逸莫可羈勒嚴滄浪所謂詩
有別才非關學也詩有別趣非關理也其然豈其然乎
贊曰金華之派平仲是傳瓊芝燦爛玉樹聯緜姑蘓之
英季迪為最震澤攸瀦洞庭攸會平仲之文季迪之詩
劉宋而下彼如何其

編修朱濂

朱濂字伯清浙江義烏人洪武三年續修元史乃徵濂

與儒士趙堦朱右貝瓊王彛張孟兼高巽志李懋李汶
張宣張簡杜寅殷弼俞同俱充纂修書成擢編修俾授
楚王經濂自幼酷嗜考亭之學其見于辭章資為講解
悉祖述之既而引年歸浦陽察陰陽鬼神之奧驗性命
心情之蘊乃即朱子精語編為理學纂言宋濂為之序
稱其所見端確所得粹凝嘉惠後學功亦至矣仕終楚
府長史

編修傅藻

傅藻字伯長浙江義烏人洪武五年以儒學教諭徵授
編修尋改應奉為東宮文學十一年五月皇太子御文
華殿命侍臣講讀春秋乃曰諸國之事雜見于二百四
十二年間艱于考索乃命藻曹分類聚先周以尊天王
次魯以崇望國次齊晉以表主盟次宋衛蔡陳以原列
爵而楚而吳而越則列之于末繕為三十卷進呈上覽
之喜賜名曰春秋本末是舉也校之者典籍劉仲質助
教儲惟德稽之者中書舍人朱孟辨宋璿桂慎鑄印副

使詹希元序之者宋濂也後藻出為武昌知府有惠政終河南按察使

編修孫作

孫作字大雅一字次和常州江陰人自曾祖澂川四傳至作家學克彰洪武六年丞相李善長等奏修日歷乃徵作與儒士徐一夔黃昇陳孟暘俱充纂修書成擢作編修作自陳外補授太平府教授復召為助教明年分教中都又明年還成均又明年陟司業著書號東家子

宋濂為作東家子傳今傳有滄螺集

編修張宣

張宣字藻仲其先清河人徙居常州之江陰父端為元江浙樞密院都事宣十歲善屬文讀書經目不忘洪武三年與高啓等被徵同修元史上親書其名擢為編修宣為人爽聞潤密而文思浩雄宋濂為撰族譜所著有春秋傳義廖道南曰予始遊南廡乃見朱伯清所撰理學纂言于司成魯公鐸及傅伯長所撰春秋本末于

司成汪公偉而孫大雅之滄螺張藻仲之傳義猶未之
見也諸儒夙際皇運弘闡賁文用心亦以勤矣贊曰義
烏多賢乃有伯清辭章爾雅玉闕瑤京伯長超越萬人
之傑沉潜三傳乃著本末次和藻仲處于江陰擢穎揚
芒輝赫儒林

編修王璉

王璉字宗器其先太原人徙居山東之長山洪武五年
以鄉舉發魁計階南宮六年正月甲寅上召見便殿命

題賦詩詩成稱旨是時舉人張唯王輝李端張鳳任敬
馬亮陳敏張昫等至上嘉其才俊遂及璉等十七人俱
充國史編修命入文華堂讀中秘書賜以冠服車駕時
臨幸策勵取其文親評優劣日命光祿給膳羞酒漿每
食太子暨諸王迭為之主而璉等侍食左右冬夏賜衣
各一襲復有白金弓矢鞍馬之賜命宋濂為之師九年
三月復命璉等攝監察御史事巡行天下糾察官吏賢
否諮訪生民休戚璉如河南迨歸奏對雅稱上意乃諭

廷臣曰文華堂諸生如璉者皆異日將相才也宋濂為之字說畧曰宗廟之器貴重實殊夏有四璉殷稱六瑚昔端木氏才堪三卿文章外見以言語稱今生既長局度純亮發為辭章大河奔放出逢盛治講學禁中天日照臨以照以融多冠莠莠我我巡行洛河貪夫夜逃良士笑歌厥用既周由體斯被生尚勗焉庶幾不器璉後為御史山東行省叅知政事

編修張唯

張唯江西永豐人曲江張子壽之後也父光遠死於賊
宋濂為之誌銘唯流寓河南以尚書領首薦擢編修入
文華堂肄業唯有雋才同列遜之

編修張昫

張昫字鳳舉河南人入文華肄業擢編修後教授南陽
瀕行辭于宋濂曰昫以布衣感上恩遇喬嶽匪高瀛海
匪深典教一邦弗稱是懼濂作文送之且稱其沉重有
識研窮遺經而造其間與可進於道是必有所試矣廖

道南曰我聖祖尊賢造士之典於是乎益徵矣投戈之暇即建禮賢館履元之初即開文華堂鴻儒俊髦文物彬彬於戲盛哉今攷之入文華者十七人而王璉張唯張翀者賴有景濂為之述也他若馬亮任敬陳敏李端王輝不少槩見可惜也哉贊曰虎觀天開石渠雲密東璧焜煌西崑赫奕濟濟多士謁謁吉人萬邦惟獻百度惟貞皇建有極古訓是式五星聚奎以兆今日

編修朱右

朱右字伯賢浙江臨海人光庭先生九世孫嘗遊李五峰陳兩峰之門洪武初預修元史大明日曆皇明寶訓授翰林編修終晉府右長史所著有白雲稿春秋類編三史鈎玄秦漢文衡深衣考誤歷代統紀要覽元史補遺凡若干卷

編修蔣敬

蔣敬字行簡其先汴人徙居金陵之錦繡里父成字翁輔孝友之士也洪武初敬為編修同蔡玄受業于宋濂

濂既銘其父矣且稱敬為人謙慎重然諾一時名士多與之遊云

編修羅公願

羅公願字從善浙江青田人父世昌為處州路教授洪武四年公願應州辟舉以書經試銓曹擢編修轉工部都水主事

編修王釐

王釐江西鄱陽人洪武初以明經授本庠教諭徵為編

修預修元史每承顧問稱旨嘗患頭風上賜以所御樂酒飲之遂愈後知南陽府所著有羣英雜言諸集


編修桑慎

桑慎字仲修世居常州遷嘉興洪武初擢編修改監察御史賢能廉直孝親睦姻苦行力學逼於古人爭廷則有折檻之風諫友則有面折之直以行部海南奏誅衛使張榮坐不避八議罪謫瓊安置未嘗怨懟凡動止合禮瓊志稱之

編修董琰

董琰字子莊江西樂安人洪武間為編修遷國子司業
廖道南曰予考國史乃得朱孟辨趙璵者以修元史徵
吳昇周孟東以賢良徵桑慎陳晟以儒士徵俱為編修
晟自撰族譜與孟辨孟東俱見宋濂文集而其行義之
詳弗可攷也孔子曰予猶史之闕文也嗚呼豈史之闕
文爾矣乎贊曰蔣敬謙慎蔡玄敦約王釐遭際朱右弘
博下迨羅周董朱為儔趙璵吳昇孟東清修桑慎陳晟

後先輝映唐虞之際於斯為盛



殿閣詞林記卷八

欽定四庫全書

史部
殿閣詞林記卷九至十一

詳校官侍讀_臣陳萬青

刑部郎中_臣許兆椿覆勘

總校官進士_臣繆琪

校對官編修_臣莊通敏

謄錄監生_臣鄧捷成

欽定四庫全書

殿閣詞林記卷九

明黃佐

廖道南撰

殿閣

洪武十五年十一月戊午倣宋制置殿閣學士以禮部尚書劉仲質為華蓋殿大學士翰林院學士宋訥為文淵閣大學士檢討吳伯宗為武英殿大學士典籍吳沉為東閣大學士是月辛酉覆命耆儒鮑恂余詮張長年

為文華殿大學士皆辭不拜既而全思誠始拜命永樂二十二年九月丁酉仁宗昭皇帝增設謹身殿大學士命太子少傅楊榮兼之其序次華蓋殿謹身殿文華殿武英殿文淵閣東閣凡六大學士至今因之而文華殿則不常設左右春坊亦時設大學士云

親擢

洪武之末翰林不及十數人壬午六月成祖即位首詔吏部及本院舉文學行誼才識之士授職聞待詔解縉

名擢居近侍召對喜其奇傑敢言益見信用七月侍書
黃淮改中書舍人入見上與語大奇之凡侍朝特命與
縉立于御榻左以備顧問一日以萬幾叢脞日御奉天
門左室每夕召對至夜分或便殿就寢賜坐榻前論議
政事同列不得與聞是時吳府審理副楊士奇在翰林
克修史官亦有譽望親擢為編修已而改給事中金幼
孜桐城縣知縣胡儼為檢討尋陞縉為侍讀胡靖為侍
講編修楊子榮為修撰而改子榮名榮繼又陞淮為編

修九月遂開內閣於東角門內召七人者諭以委任腹
心至意俾入處其中專典密務雖學士王景輩不得與
焉明日賜織金羅衣各一襲時幾務孔殷每旦奏事退
內閣之臣造展前進呈文字商機密承顧問率漏下十
數刻始退十一月陞縉為侍讀學士靖淮儼皆侍讀榮
士奇幼孜皆侍講復靖名廣永樂元年九月上御右順
門召縉及士奇諭之曰朕即位以來爾七人者朝夕相
與共事鮮離左右朕嘉爾等恭順不懈皆賜五品公服

二年正月七人皆賜二品金織衣且勞之曰天下事咸
朕與若等同計非若六卿之分理也三月冊立儲宮進
縉為學士兼右春坊大學士奉議大夫准為左春坊左
庶子廣為右春坊右庶子皆奉議大夫仍兼侍讀儼為
左春坊左諭德仍兼侍讀榮為右春坊右諭德仍兼侍
講士奇以本官兼左春坊左中允幼孜以本官兼右春
坊右中允各賜袍笏九月儼出為國子祭酒四年縉坐
事去廣遂進學士兼左春坊大學士奉政大夫五年二

月淮進右春坊大學士仍兼侍讀尋進學士仍兼右春坊大學士士奇進左春坊左諭德幼孜進右春坊右諭德俱奉訓大夫仍兼侍講十二年淮坐事去十四年四月廣進文淵閣大學士榮幼孜進學士三人仍兼春坊原職十五年二月士奇進學士仍兼春坊原職十六年五月廣卒十八年閏正月命榮幼孜皆為文淵閣大學士兼學士十九年正月改士奇為左春坊大學士終永樂之世內閣之臣不過五品而華蓋等殿大學士亦不

復設蓋雖不崇以穹秩然皆出於親擢寄以天下大政
諫行言聽得以盡其啓沃是故英宗復辟大學士李賢
柄政復永樂之舊時修撰岳正每開口論事以世務自
許大內庶知其名吏部尚書王翱亦薦之天順元年六
月召見文華殿上見遽曰好問年幾何對曰四十又曰
正好問何處人對曰灤縣人又曰又是北方人問治何
經曰尚書上曰是書經尤善問何科進士對曰正統十
三年上益喜曰又是我所取者乃顧曰今用汝內閣叅

預機務凡事為朕主張許彬老矣不足恃也正頓首辭
至再乃出赴閣九月朔御文華殿召太常少卿兼侍讀
彭時入見令近榻前問曰汝是正統十三年狀元邪對
曰不才誤蒙寵渥拔擢至今感戴不忘因叩頭者三又
曰第二名是陳鑑第三名是岳正對曰是又問今年幾
何對曰臣犬馬之齒四十二上曰正好用出外喫酒飯
時叩首謝命赴文淵閣辦事蓋前此未嘗無親擢者觀
此倚毗宰輔禮重儒臣之意可知矣咨詢必及其年者

豈不以老成謀國必有徽猷新進少年或至敗事歟用人慎始如此真可謂後世法

視事

殿閣大學士雖設自洪武中然同在內閣視事則自永樂初年始其坐次不敢正席者以車駕所嘗臨幸故也天順中大學士李賢疑與外衙門同將欲正席坐同列彭時不可乃止時常記其事曰文淵閣在午門之內迤東文華殿南面磚城凡十間皆覆以黃瓦揭文淵閣三

大字于閣門中間置紅櫃藏歷朝訓錄副本前楹設櫬
東西餘四間後列書櫃隔前楹所李賢自吏部進以傍
坐不安令人移紅櫃壁後欲設公座時曰不可聞宣德
初年駕幸至此故不設公座李曰事久矣今設何妨時
曰此內府也亦不宜南面正座李曰東邊會食處與各
房却正座如何時曰此有牌扁故為正彼皆無扁故也
李曰東閣有扁亦正坐何必拘此時曰東閣西面非正
南也李詞氣稍不平曰烏有居是官而不正其位乎時

曰正位在外諸衙門則可在內決不可如欲正位則華
蓋謹身武英文華諸殿大學士將如何耶蓋殿閣皆至
尊所御原設官之意止可侍坐以備顧問決無正坐理
李語塞然意猶未已踰日上遣中官傳恭送孔子并四
配像一龕置於中間又數日遣太監裴當送聖賢畫像
一副來懸於龕後壁上乃罷不設坐焉

幾務

內閣叅預幾務肇自成祖然惟大學士暨學士而已永

樂二十二年八月仁宗立以文淵閣大學士楊榮等輔導久積有年勞乃命陞榮為太常寺卿金幼孜為戶部右侍郎俱兼前職揚士奇為禮部左侍郎兼華蓋殿大學士起前左春坊大學士兼學士黃淮為通政司通政使兼武英殿大學士四人俱掌內制內閣帶三品官銜始此九月加士奇少保仍兼前職榮太子少傅兼謹身殿大學士幼孜太子太保兼武英殿大學士內閣位至三孤始此尊師重傳之禮至是極矣十一月士奇復進

少傅兼職如故洪熙元年正月淮進少保戶部尚書士
奇進兵部尚書幼孜進禮部尚書俱兼大學士如故內
閣帶尚書官銜亦始此是年閏七月宣宗既嗣位罷弘
文館命太常寺卿兼學士楊溥與士奇等同視事宣德
元年三月陞行在禮部右侍郎張瑛為左侍郎兼華蓋
殿大學士九月淮致仕二年二月陞行在戶部左侍郎
陳山為本部尚書兼謹身殿大學士瑛亦進本部尚書
兼職如故二人者儲宮舊僚也自是每朝必晉陟侍從

謂之從龍恩云然山與瑛皆不厭人望山直內閣無何被疎斥即致仕去久之瑛亦改南京禮部尚書六年十二月幼孜卒九年八月溥進禮部尚書兼職如故九月瑛起復入見憫其已老留為尚書兼大學士英宗在東宮天資明睿尚冲年委裘未及出閣講學故無推恩者正統元年七月瑛卒三年四月士奇暨榮俱進少師兼職如故溥進少保兼武英殿大學士內閣以實錄成進官始此五年七月榮卒九年三月士奇卒十一年二月

溥卒於是老成盡矣是時侍講學士陳循進戶部左侍郎兼學士入閣叅預幾務侍讀苗衷侍講高穀修撰馬愉曹鼐以經筵日講官皆進侍講學士與循同視事未幾鼐進吏部左侍郎衷進兵部左侍郎俱兼侍講學士愉進禮部右侍郎穀進工部右侍郎俱兼侍讀學士愉尋卒十四年八月鼐扈從北征沒於土木之難景泰以郕王監國擢修撰商輅彭時入閣辦事及即位藩府舊僚推恩止侍郎不得厠內閣而循穀各進本部尚書兼

學士輅時皆進侍讀時以憂去又擢戶部右侍郎江淵
兼學士入閣叅預幾務尋又命禮部右侍郎俞綱綱在
內閣三月改南京禮部蓋朝廷欲修永樂故事擢用諸
人然進退亦頗輕矣景泰元年二月秉進本部尚書兼
學士尋致仕九月輅進學士十一月以禮部左侍郎王
一寧國子監祭酒蕭鎡各兼學士俱入閣叅預幾務尋
加循少保兼文淵閣大學士穀少保兼東閣大學士仍
兼尚書如故四月命循穀俱兼太子太傅陞淵一寧鎡

俱太子太師輅兵部左侍郎學士兼左春坊大學士一
寧尋卒十月命太子太保兼都察院左都御史王文入
閣辦事外官不由翰林得叅預幾務者始此初文與中
官王誠結為兄弟謀入閣嘗私以語高穀會有中旨增
內閣員陳循舉蕭鎡禎穀遂舉文奏上果用文人皆駭
諤四年二月命文為太子太保吏部尚書兼學士尋加
少保兼東閣大學士尚書如故七年五月改循兼華蓋
殿大學士穀文俱兼謹身殿大學士鎡進本部尚書兼

職如故英宗復辟天順元年正月命都察院右副都御史徐有貞兼學士入閣叅預幾務有貞始名理由侍講陞任以迎復功故有是命是日陞太常寺卿許彬為禮部左侍郎兼學士與有貞同視事明日陞有貞為兵部尚書兼職如故詔罪謀立襄藩者王文伏法陳循江淵謫戍蕭鎡商輅發為民蓋事關社稷有所不得已故也又明日陞大理寺卿薛瑄為禮部右侍郎兼學士入閣叅預幾務又數日穀致仕三月命吏部右侍郎李賢兼

學士入閣叅預幾務有貞為奉天翊運推誠宣力守正文臣特進光祿大夫封武功伯兼東閣大學士尋改兼華蓋殿大學士掌文淵閣事曰掌文淵閣事有貞所自署也閣在御府大內非人臣所可掌矧非軍功冒進封爵固占知其不終矣尋進賢為本部尚書兼官如故五月彬瑄轉左侍郎仍兼原職六月命通政司左叅議兼侍講呂原繼命修撰岳正俱入閣叅預幾務有貞賢坐事左遷賢為吏部左侍郎瑄遂致仕去瑄制行純慤邃

於理學其去也蓋見幾而作云七月有貞革爵遠竄彬
坐黜復賢官視事如故永樂中胡儼自內閣出不復再
入再入自賢始也正尋坐事去九月命太常寺少卿兼
侍讀彭時復入閣叅預幾務十二月時進兼學士改原
為侍讀學士二年五月原進學士六年七月加賢太子
少保八月原以憂去十一月卒七年二月陞詹事府詹
事陳文為禮部右侍郎兼學士入閣叅預幾務正統八
年正月憲宗嗣位三月復正原職不預幾務加賢少保

魚華蓋殿大學士尚書如故文吏部左侍郎時吏部右侍郎仍兼原職十月時進兵部尚書成化元年三月文進禮部尚書二年十二月命太常寺少卿兼侍讀學士劉定之入閣叅預幾務是年賢以憂去奪情起視事尋卒三年三月復商輅原職視事如故八月文時俱加太子少保仍前尚書兼文淵閣大學士定之進工部左侍郎兼學士四年四月文卒十月輅進本部尚書定之轉禮部左侍郎俱兼職如故七年六月定之卒十一年正

月時進少保三月卒四月輟進文淵閣大學士十二年
六月加太子少保改吏部十三年二月進兼謹身殿大
學士十四年輟致仕去加少保終成化之世又有劉珝
萬安劉吉尹直彭華弘治中則徐溥丘濬劉健李東陽
謝遷正德中則焦芳劉宇曹元王鏊劉忠楊廷和梁儲
費宏靳貴楊一清蔣冕毛紀若芳與宇元由逆瑾進者
也其末也惟廷和惟儲惟冕惟紀預聞嘉靖初政焉以
近事尚在人耳目不復悉記夫內閣密勿之地寄以幾

務即虞書所謂股肱說命所謂作礪作舟楫作霖雨也
始雖以待儒彥而其後則元老鉅寮為天下具瞻者乃
得與焉百餘年來政治樞要實在於此舊制雖不設丞
相而世以宰相稱之嗟乎用非其人固足以覆餗然或
不見親且信焉雖有真儒安所宣其效哉

擬旨

唐宋以來臣僚章奏凡有所批答皆臣下代言中書省
及集賢院翰林學士專之洪武初始猶設中書省丞相

政事由以出納其後革去分任五府九卿衙門中外章奏皆上徹御覽每斷大事決大疑臣下惟面奏取旨有所可否則命翰林儒臣折衷今古而後行之故洪武中批答皆御前傳旨當筆即所書天語尚溫也永樂洪熙二朝每召內閣造膝密議人不得與聞雖倚毗之意甚專然批答出自御筆未嘗委之他人也至宣德時始令內閣揚士奇輩及尚書魚詹事蹇義夏原吉於凡中外章奏許用小票墨書貼各疏面上進謂之條旨中易紅

書批出御筆親書及遇大事猶命大臣面議議既定傳
旨處分不待批答自後始專命內閣條旨然中每依違
或徑由中出嗣是若正統初年委政中官王振一至於
此上下蒙蔽乃及土木之難及天順復辟每事與內閣
面議然後批行弘治末年總覽權綱內閣條旨多孝廟
御書事涉重大至厘宣問幾復國初之舊正德時批答
大率與正統相類今之建議者徒知批答當依內閣所
條而不知有面議傳旨故事或誤以條為調謂調和之

義也。審爾則是漫無可否以聽上裁。惟恐見忤矣。豈所望於以道事君者哉。苟利社稷死生以之可也。

密疏

內閣密務有難颺言敷奏者。永樂許密封進。呈謂之密疏。已亥十七年十二月己丑。學士楊榮密疏進言十事。皆斥五府六部三法司積弊。成祖嘉之。密諭榮曰。汝言寔切時病。但汝為腹心臣。若遽進此言。恐羣臣益相猜疑。不若使言官言之。於是得監察御史鄧真俾入奏。衆

皆股栗免冠請罪詔諸司即日悛改怙終者不赦蓋榮
所為奏留中真則受其意也洪熙初改元兵部尚書李
慶言於上曰民間馬畜蕃盛已散之軍伍尚餘數多請
令朝覲官領之少蘇民力大學士楊士奇獨密奏謂朝
廷求賢任官今乃使養馬而課責與民同非貴賢賤畜
之意明日面請內批罷其事不報明日又入對請罷上
曰吾偶忘之當即批出不爽也午刻上御思善門諭曰
內批豈真忘念卿孤立為衆所傷不欲因卿言而罷耳

今有名矣出示一章乃按察使陳智所言者命士奇據
几草勅止之已領者准洪武中官負乘例不責生息虧
損不責償未給者止勿給復謂曰繼今令有不便惟密
與朕言李慶輩不識大體不足語也二十二年十一月
學士楊溥密疏言事上嘉納手勅獎諭之曰覽卿所奏
為國家之計誠合朕心但望卿始終如一知無不言相
朕致治以承天休感卿忠懇特用酬報今賜卿綵幣一
雙鈔一千貫卿其領之夫事幾不密則害成今日所以

委曲為之處者如此而又寵以旌賞真可謂一德一心矣其後內閣言事循此例類用題奏揭帖不宣聞於外云天順癸未空中有聲大學士李賢密疏曰傳言無形有聲謂之鼓妖上不恤民則有此異因條十事上陳英宗嘉納詔皆從之頒行天下賢又請罷江南所造段足磁器清錦衣衛囚止各邊守臣進貢下番所遣使臣停中外買辦采辦詔不從賢執之數四止取前十條行之左右見賢力爭皆寒慄同

列亦為賢懼賢曰古之大臣知無不言今雖不能盡然至於利害繫國家安危者豈可默默以苟祿位然聖明亦不以為忤也蓋嘉謀嘉猷入告于內與颺言敷奏者不同必利害係國家安危而後言之又與爭一事之得失陳一時之利害者不同內閣事功稱三楊一李然其所遭際可考也夫惟聲色不動而誠意潛孚閱歷既多而識見素定乃可以當此然亦難矣岳正在內閣嘗密言吉祥石亨罪惡二人譖之被

黜有士人告之曰先生犯孔子戒矣問之云何則曰未信而諫是也正曰臣被簡用置左右責任教誡甚至敢不盡心若子以諫官處我則恐未然夫正之言誠是也沃心之論造膝之謀初不事於表暴而天下自陰受其賜此內閣之所以異於諫官也若先朝委任楊李真可以為萬世法

會議

宣德以前每有政事與羣臣面議正統十年始命內閣

官與各衙門會議遂為例徐有貞曰景泰四年十月詔以河決沙灣久弗克治集左右臣弼暨百執事之官于文淵閣議舉可以治水者僉以有貞應上特用之有貞立碑為記近例凡厥時政有大事當會議者該部奏請會如合會儒臣則本院詹事府左右春坊司經局及國子監皆預

繕寫

永樂時內閣進學者二十八人皆面稽而身教之王英

王直德器才學尤為儕輩所推首擢為修撰以皆慎密
可任並揀入秘閣書進呈幾密章疏永樂末累擢至講
讀學士蓋嘗試以為大用之地云至宣德時復增左春
坊大學士曾榮俾入直未幾榮卒二王亦出理部事繕
寫章疏之任遂廢

書辦

大明會典云凡內閣所掌制勅詔旨誥命冊表寶文玉
牒講章碑額及題奏揭帖等項一應幾密文書及王府

勅符底簿皆制勅房書辦文官誥勅及番譯勅旨并四夷來文揭帖兵部紀功勘合底簿等項皆誥勅房書辦合用中書舍人等官於本院或各該衙門帶俸遇有陞遷仍舊供職其有堪別用者亦從吏部推舉

閣禁

祖宗規制嚴密內閣之禁凡一應官負閑雜人等不許擅入違者治罪今內閣門額尚懸嚴旨葉盛日記有云文淵閣宥密之地外臣非公事不能至廷陞機宜無敢

世者楊文貞文定文敏三先生典刑尚存文貞間遇知
已或問近日外間有何事或某事便否亦甚鮮也後來
者則有稍稍傳聞于人甚而方面官見辭後必造謁或
拘舉子入考文字又甚而造膝之言伐言之筆不待莫
出禁門而已徧告多人矣此蓋指景泰中之用事者故
云然

叅見

凡本院官入見內閣必先使孔目通姓名而後見初授

官謝恩後入見例留飯可齋雜記云時官修撰謝恩後偕同年陳緝熙岳季方詣閣下見曹陳苗高四先生遂留早餐酒飯隨光祿寺所供不增設諸先生笑曰此是本院故事儒官清淡只如此蓋以僚友待之也其後內閣官尊或有座主門生之分遂今六品以下揖於階下五品及詹事府官送迎如僚友禮陞朝見朝辭及冬正旦行禮後不暇易服往見焉非公事不復至或議朝政質問可否使孔目請入乃入外官入見亦以公事會典

所載凡各衙門領勅官負俱赴內閣會有勅書方赴鴻臚寺報名辭朝領勅其他則國子監官送書課提督四夷館送番譯文字之類具有定規云

弘文

洪武三年四月庚辰置弘文館設學士一員及校書郎等官九年閏九月定官制遂罷之居是職者劉基詹同羅復仁胡鑑也仁宗即位建弘文閣於思善門外蓋法國初遺意永樂二十二年八月命本院學士楊溥掌之

與侍講王進時承顧問討論經籍又擢編修楊敬給事中何澄俾預焉又起用檢討陳繼凡在閣者五人駕嘗臨幸講論經史不倦洪熙元年閏七月溥等奏納弘文閣印各還原任儲闈可之仍命溥與楊士奇等同治內閣事正德初建議者謂宜倣弘文閣故事特命侍從文學之臣更番入直或召天下名賢文學恬退者一二人如起用陳繼之例聽政之暇游息之間時至閣中畧去威嚴從容詢問或講經書或論古今成敗有暇則至不

必拘其時有疑則問不必嚴其禮如是則聖學緝熙義理純熟凡百玩好自不暇及而所召必皆一時之聞人則亦可以收拾天下之遺才矣此亦祖宗君臣同遊之漸未必無補惜論建未及付之空言而已

東閣

正統丁卯詔選本院官之有譽望者入東閣讀中秘書修撰劉儼商輅編修陳文呂原等七十人且特命之侍經筵日在內府進學不倦蓋儲之以待大用也厥後多

為名臣嘉靖丁亥五月朔日食臣道南進陳洪範九疇
疏以徵時政仰荷御劄云翰林官中有才識忠行者日
輪二員入直東閣凡經書史鑑有關君德者日錄所聞
以贊朕不逮於是大學士楊一清奏講大學衍義上特
命顧鼎臣講洪範臣道南講無逸臣於終篇引呂祖謙
論曰天之生萬物也健而不息以成悠久之功君之生
萬民也勤而無逸以成惇大之治故人君之德在乎法
天而已矣我太祖高皇帝命儒臣進講無逸諭曰自昔

有國家者未有不以勤而興以逸而廢周公是書上自
天命之精微下至民生稼穡之艱難以及閭里小民之
怨詛莫不具載先事而慮其意深矣朕每觀是篇反覆
詳味求古人之用心嘗命儒臣書于殿壁朝夕省閱以
為監戒仰惟皇上敬天愛民懋學勤政揭無逸豳風于
殿序以紹帝王之心法軫耕夫織女之勤苦以昭聖祖
之徽猷雖商之三宗周之三后有不能企及焉者矣尤
願剛健純粹孚乾運之不息含宏光大廣天德之好生

明作有功而百司庶府咸貞其度曲成不遺而兆民庶
物各得其所中庸曰故至誠無息不息則久久則徵徵
則悠遠悠遠則博厚博厚則高明博厚所以載物也高
明所以覆物也悠久所以成物也博厚配地高明配天
悠久無疆臣愚端有望于今日

殿閣詞林記卷九

欽定四庫全書

殿閣詞林記卷十

明黃佐

廖道南撰

文華

洪武六年開文華堂于禁中以為儲材地詔擇鄉貢舉人年少俊異者俾肄業其中正月甲寅選河南第一人張唯上召見便殿親命題俾賦詩詩成稱旨唯及王輝李端張翀皆擢編修蕭韶為秘書監直長賜冠帶衣服

又明日山東第三人王璉等見召試如之璉及張鳳任
敬馬亮陳敏皆擢編修賜予亦如之受命入堂讀書詔
贊善大夫宋濂正字桂彥良等分教之上謂曰昔許魯
齋諸生多為宰輔卿其勉之聽政之暇輒幸堂中取其
文親評優劣命光祿日給饌每食皇太子親王迭為主
唯等侍食左右冬夏賜衣及金弓矢鞍馬寵錫甚厚濂
輩雖司啓迪顧諸生皆上所親教不敢以師道自居一
日侍燕閒詢及肄業進益濂對曰無如張唯者因備述

其雋才請錄為弟子員上笑而許之蓋同時進者凡十有七人又選成均之秀入武英堂俾練習政事方徵彭通宋善王惟吉等皆拜給事中禮遇雖不及唯等然侍從車駕應制被顧問未始異也其後多至執政有聲光云

文淵

永樂三年正月壬子成祖命學士解縉等於新進士中選其英俊者俾就文淵閣進學乃選修撰曾棨編修周

述周孟簡庶吉士楊相王訓王直吳紳彭汝器劉子欽
余學夔童朴盧翰熊直王道羅汝敬沈升柴廣敬王英
余鼎湯流洪順段民楊勉章敬李時勉倪維哲陳敬宗
袁添祿二十八人入見上諭勉之曰人須立志志立則
功就天下古今之人未有無志而能建功成事者汝等
簡拔於千百人中為進士又簡拔於進士中至此固皆
今之英俊然當立志遠大不可安於小成為學必造道
德之微必具體用之全為文必並驅班馬韓歐之間如

此立心日進不已未有不成者古之文學之士豈皆
天成亦積功所致也汝等勉之朕不任爾以事文淵
閣古今載籍所萃爾等各食其祿日就閣中恣爾玩
索務實得於已庶國家將來皆得爾用不可自怠以
孤朕期待之意時庶吉士周忱自陳年少願進學上
喜曰有志之士也命增忱為二十九人遂命司禮監
月給筆墨紙光祿給膳禮部月給膏燭并鈔工部擇
近第宅居之且命縉領其事數召至便殿問以經史

諸子故實或至抵暮方退五日一休沐使內臣隨之校尉備騶從人莫不歆其榮艷上時搜奇書僻事以驗所學榮等多對誦如流者上甚喜之多所獎賚恒顧羣臣曰秀才輩性子直可親近縉嘗以鍾山龍蟠詩試諸人甚稱彭汝器所作一日上問捕蛇者說汝器即朗誦於前甚奇其才王訓以大江遶金陵賦進上最稱之具程試課業大嚴賞罰而王英王直尤為儕輩所推讓蓋是時庶吉士隸本院者尚多如孫子良涂

順李昌祺蕭省身江鍊張宗璉田忠等無慮數十人皆
不得與選後上親征巡狩雖有庶吉士之選如甲申例
則而車駕不及親蒞焉宣廟末年銳意儲才自臨御以
來三科進士數百人援其尤者凡二十八人以應二十
八宿時癸丑丙辰諸進士發各衙門觀政或奉使出外
詔追還選之皆入文淵閣進學其優禮給賜一循永樂
甲申之制仍賜御製詩以示勉勵

東閣

景泰二年詔選庶吉士并首甲柯潛等二十八人命進學于東閣賜居第給大官酒饌及膏紙費命內閣大臣典領之蓋不別立師不出就外公署一如永樂初科故事然車駕未嘗親蒞教也五年亦選庶吉士暨首甲孫賢等十八人遂遵正統時例矣

公署

庶吉士在外公署教習始自正統初年內閣奏請學士等官二員教習本院仍行戶部給燈油錢兵部撥皂隸

刑部給紙劄工部撥房屋順天府給筆墨光祿給酒飯
內閣按月考試俟有成效送吏部銓注本院并各衙門
職事自是庶吉士教習與文華堂文淵閣時舊規不同
其所撥給循故事耳今宜依祖宗時入禁中侍燕閒承
顧問上以儲材蓄德為教則下亦必涵養進修自勗不
惟人才造就而君德贊輔有攸賴焉若不得已就外教
習領其事者宜奏請專使校讐中秘書曰令有所撰述
暇則演習經筵講章日夕與討論古今商確經史同異

得失且究竟名理歸諸身心以行誼相砥勵務得其實
以為國家用若其學業高下宜默成之其或求見邀名
則斥而退之勿收匪人以招物議則非惟育材有成效
抑亦光昭祖訓也苟舍大綱先末藝以詩文記誦為學
而道德政事則忽棄焉授受之際既近於學究而乃設
會簿稽勤惰雖嚴聲厲色以督責之亦淺之乎其待士
矣正統以來在公署讀書者大都從事詞章內閣按月
考試則詩文各一篇第其高下具揭帖開列名氏發本

院以為去留地致使卑陋者多至奔競有志者甚或謝病而去不能去者多稱病不往將近三年則紛然計議邀求解館最可笑也弘治癸丑學士李東陽程敏政教庶吉士至院閱會簿悉注病假而去乃賦一絕云回廊寂寂鎖齋居白日都消病歷餘竊食大官無寸補綠陰亭上勘醫書其流弊一至於此又聞之前輩云天順甲申庶吉士次年相率入內閣解館大學士李賢謂曰賢輩教養未久奈何遽欲入仕有計禮者抗聲對曰今日

比永樂時何等教養且老先生從何處教養來賢稍責之即曰吾輩教習雖例該三年已燒却一年矣謂癸未春闈災故也賢怒甚明日請旨各授職罰禮觀政刑部又數月授南京刑部主事禮之言雖近不恭然不可謂無稽者觀此則教法不克復舊久矣

考選

考選庶吉士始自洪武乙丑迨永樂初益重其事大率每科必選宣宗時合三科進士親試之正統丙辰英廟

親選庶吉士于文華殿取蕭鎡等十二人已未以後罷之至戊辰始純選北方及蜀士為庶吉士被選者萬安等二十人不親試也自是其事付內閣例取平日所為詩文或繙閱試卷兼採名實禮部會同吏部試以古文暨詩合式者改送吏部讀書景泰辛未選吳匯等二十五人甲戌選丘濬等十八人皆薦選南北士天順庚辰三月上御文華殿召李賢諭曰永樂宣德中常選庶吉士教養待用今科進士中可選人物端重語音正當者

二十餘人為庶吉士止選北方人若南方人有似彭時者選取賢出以語時時疑賢欲抑南人因應之曰立賢無方何分南北賢曰果上意也奈何已而太監牛玉復傳命如前令內閣會吏部同選時對牛曰南方士豈獨時比優於時者甚多也是日考選取十五人南方止三人而江西惟張元禎得與焉天順甲申選李東陽等十八人自是皆兼選南北士成化丙戌選林瀚等二十四人已丑選費閭等十五人戊戌選梁儲等二十八人丁

未選程楷等三十人弘治癸丑選顧清等二十人是科
清等已發各司觀政後乃得旨取自各司者選丙辰選
顧潛等二十人壬戌選胡煜等二十人乙丑選崔銑等
三十人正德辛未選許成名等三十三人丁丑選汪佃
等三十四人辛巳選道南等二十四人

教書

洪武中宋濂永樂初解縉皆常領庶吉士特與之講究
爾未嘗抗顏為師也宣宗時親教庶吉士考其文藝與

永樂時同至正統戊辰乃專命詹事兼侍講學士劉鉉
祭酒王詢教書自後以為例

考藝

永樂中召試庶吉士文藝多入內殿宣宗嘗御文華殿
召諸庶吉士試以諸葛孔明可與興禮樂論親第其高
下以鄭建為首賜寶鈔百錠餘有差蓋仍永樂之舊也
正統元年簡諸進士入翰林為庶吉士時蕭鎡以宣德
丁未進士需次于家久乃得名至與焉召試文華殿取

鑑為首王鑑次之凡二十五人云

齋宮

宣德五年三月徵庶吉士三十人分隸近侍諸衙門如洪武乙丑之制次日引入齋宮御試止用八人仍擇進士有文望者預試命題出取士何以得真才論吳節為首范理第二皆上所親裁在前列者賜白金五兩楮幣五十緡餘有差楊寧等詔歸鄉讀書至九年乃合選二十八人入翰林焉其在六科為庶吉士者自廖莊而下

多名士正統後庶吉士止隸翰林然考藝出於當宁者罕矣

奇童

大明會典凡各處舉到幼童奉旨送本院讀書習字月給米食內閣稽考課業俟有成效奏請擢用其願科舉出身者聽按奇童被薦入翰林讀中秘書者始自正統初兵部尚書程信之子敏政及楊一清自楚舉薦李東陽自順天薦英皇出題命對曰鵬翮高飛搏扶搖之九

萬敏政云龍墀獨對陳禮樂之三千東陽云龍顏端拱
位天地于兩間上首肯之成化末崇仁洪鍾七歲善書
有司以奇童薦憲宗召見嘉嘆命入翰林充秀才讀中
秘書

恩蔭

天順元年右都御史耿九疇子裕為給事中建言父子
同在要地非宜遂改裕為檢討九疇尋坐事裕亦出為
泗州判官正德中大學士焦芳劉宇改其子焦黃中劉

仁嘉靖中席書為禮部尚書改其弟春孫交為戶部尚書改長子元俱為修撰編修等官

添設

洪武十六年十月增本院尚書博士二人秩從八品以儒士饒仲恭張庸為之令仲恭於潭王府說書庸於魯王府說書添說始此

舉官

正統元年奏准知縣有缺令在京四品以上官及國子

監翰林院堂上官各一員從吏部推訪除授不職者并坐舉主

諸科

正統十四年詔各處儒士照永樂間事例送本院嚴加考試選用不中者發原籍為民葉盛曰永樂中清江喻行之以文學舉試記里鼓正統中馮益試事道皆不知所謂莫能措一辭所謂名浮於實君子弗貴者歟如復諸科考藝觀德付諸翰林可也

考貢

洪武十六年二月丙申命天下學校歲貢生員時諫官有言命禮部榜諭天下府州縣學自明年為始歲貢生員各一人正月至京從翰林院試經義四書義各一道判語一條中式者入國子監不中者罰之故有此命也會典曰凡考試歲貢生員禮部奏請出題本部官赴內閣領題試筆送卷本院官批定去取送部奏請施行嘗聞編修張元貞考校精覈歲貢士鮮入格者時服其公

云

校職

會典云凡考試願就教職舉人監生吏部奏請出題本部官赴內閣領題試畢送卷本院官批定中否送部奏請施行又云凡各處儒學訓導九年考滿吏部出題考試初場四書本經義各一道二場策論各一道印封文卷送內閣委本院官批定去處送部奏請施行

汰吏

洪武二十九年四月命本院官會同禮部考國子監六堂師弟子甄別高下送吏部以次錄用其後不知何時遂廢永樂中有詔汰在京儲司冗官左贊善陳完署春坊事即澡筆書其當畱其當去衆服其明決然此後亦不聞焉會典云天順八年奏准吏部都察院會同內閣考察在京五品以下文職并在外布按二司有不公者許科道官指實劾奏又云宣德七年勅吏員三考滿當授官者吏部通引於內府會同六部都察院翰林院堂

上官出題南北類試其文義粗曉行移得當書體不謬
三事俱可取者為一等二事可取者為二等俱不可取
者放回為民當差可齋雜記云東閣為翰林官會揖處
一日各部堂上官會考三考吏來集閣下諸同寅遂聯
步而出周修撰旋不允七年四月起復學士柯潛為祭
酒具疏懇乞終制許之時內閣大學士劉吉起復侍講
陳音勸使終制且與之書云陳升之起復為相制曰閔
子經而服政先賢稱得事君之宜晉侯墨而即戎前志

卷十
謂達變禮之用嗚呼升之果何人哉自羅倫之疏傳于世而先王制禮之議始嚴矣

外補

洪武六年編修孫作辭不拜乃乞外改太平府學教授
七年編修張翀入對乞外改南陽府學教授永樂中編
修李禎改高州府學教授陳景著改福州府學教授禎
以痼疾景著以養母俱乞外而景著得任原籍厥後作
起復為司業翀起復為御史貞暨景著未久卒於任英

宗時始擇文學之臣出任憲司提督學政正統元年修撰王鈺自致仕起用擢江西僉事提督學校未幾檢討陳璉亦出為廣西提學僉事自是本院官乞外者援以為例成化中侍讀焦芳編修敖山弘治中編修蘇葵檢討李遜學劉瑞正德中編修余本檢討盛端明張邦奇皆然歷俸稍深則擢副使若葵則以事忤權貴而去者學士王鏊贈之詩曰嚴生久厭承明直楊億俄成乞外書蓋有所為而發

名試

洪武初南昌縣學訓導朱善以學行聞本府上其名詔擢為教授八年命天下教職曾被薦擢者赴京師上廷試之擢善第一除修撰十六年十月東昌府學教授馮叡考最除左贊善二十年十一月戊子以河南府學訓導葛鈞為侍講學士三十年六月召試行人司副陳性善行人陳成擢檢討他如傅藻袁渙睢稼唐肅等擢應奉孫蕢等擢典籍皆起自州縣庶寮成祖入繼大統間

桐城知縣胡儼有文學召試之稱旨改除檢討

殿閣詞林記卷十